


唐人绝句七言八



萬首唐人絕句卷第三十三

七言一百首

長樂部
振錄西
諸花本



夜巖謠

施肩吾

夜上幽巖踏靈草松枝已踈桂枝老新詩幾度惜不
吟此處一聲風月好

島夷行

腥臊海邊多鬼市島夷居處無鄉里黑皮年少學採
珠手把生犀照鹹水

帝宮詞

自得君王寵愛時敢言春色上寒枝十年宮裏無人

問一日承恩天下知

歎花詞

前日滿林紅錦遍今日遶林看不見空餘古岸泥土
中零落燕脂兩三片

杜鵑花詞

杜鵑花時天艷然所恨帝城人不識丁寧莫遣春風
吹留與佳人比顏色

曉光詞

日輪浮動羲和推東方一軋天門開風神爲我掃煙
霧四海蕩蕩無塵埃

望曉詞

攬衣起兮望秋河濛濛遠霧飛輕羅蟠桃樹上日欲
出白榆枝畔星無多

海邊遠望

扶桑枝邊紅皎皎天雞一聲四溟曉偶看仙女上青
天鸞鶴無多采雲少

聽南僧說偈詞

師子座中香已發西方佛偈南僧說惠風吹盡六條
塵清淨水中初見月

春日美新綠詞

前日萌芽小於粟今朝草樹色已足天公不語能運
爲驅遣羲和染新綠

對月憶嵩陽故人

團團月光照西壁嵩陽故人千里隔不知三十六峯
前定爲何處峯前客

贈莎地道士

莎地陰森古蓮葉游龜暗老青苔甲池邊道士誇眼
明夜取蟪螟摘蚊睫

效古詞二首

莫愁得新年十六如蛾雙眉長帶綠初學篋篋四五

人莫愁獨自聲前足

姊妹無多兄弟少舉家鍾念年最小有時繞樹山鵲
飛貪看不待畫眉了

冬日觀早朝

紫煙捧日爐香動萬馬千車踏新凍繡衣年少朝欲
歸美人猶在青樓夢

觀吳偃畫松

君有絕藝終身寶方寸巧心通萬造忽然寫出澗底
松筆下看看一枝老

題山僧水閣

山房水閣連空翠沉沉下有蛟龍睡老僧趺坐入定
時不知花落黃金地

登峴亭懷孟生

峴山自高水自綠後輩詞人心眼俗鹿門才子不再
生怪景幽竒無管屬

吳中代蜀客吟

身狎吳兒家在蜀春深屢唱思鄉曲峨眉風景無主
人錦江悠悠爲誰綠

戲詠榆莢

風吹榆錢落如雨繞林繞屋來不住知爾不堪還酒

家漫教夷甫無行處

寄李補闕

蒼生應怪君起遲蒲輪重輾嵩陽道功名遂來不
來三十六巢仙鶴老

貧客吟

檻毯蔽衣無處結寸心耿耿如刀切今朝欲泣泉客
珠及到盤中却成血

誚山中叟

老人今年八十幾口中零落殘牙齒天陰偃僂帶嗽
行猶向巖前種松子

憶四明山泉

愛彼山中石泉水幽聲夜落虛窻裏至今憶得卧雲
時猶自涓涓在人耳

聞山中步虛聲

何人步虛南峯頂鶴唳九天霜月冷仙詞偶逐東風
來誤飄數聲落塵境

題龍池山人

主人家在龍池側水中有魚不敢食終朝采藥供仙
厨却笑桃花少顏色

翫新桃花

幾歎紅桃開未得忽驚造化新裝飾一種同霑榮盛
時偏荷清光借顏色

山石榴花

深色燕脂碎剪紅巧能攢合是天公莫言無物堪相
比妖艷西施春驛中

翫友人庭竹

曾去玄洲看種玉那似君家滿庭竹客來不用呼清
風此處挂冠涼自足

秋夜山居二首

幽居正想食霞客夜久月寒珠露滴千年獨鶴兩三

聲飛下巖前一枝栢

去鴈聲遙人語絕誰家素機織新雪秋山野客醉醒
時百尺老松銜半月

秋夜山中別友人

獨鶴孤雲兩難說明朝又作東西別知君少壯無十
年莫愛閑吟老松月

贈別王鍊師往羅浮

道俗駢闐留不住羅浮山上有心期却愁仙處人難
到別後音書寄與誰

春日食霞閣

灑水初晴物候新食霞閣上最宜春山花四面風吹
入爲我鋪床作錦茵

喜友再相逢

三十年前與君別可憐容色奪花紅誰知日月相催
促此度見君成老翁

候仙詞

西歸公子何時降南岳先生早晚來巡歷世間猶未
遍乞求鸞鶴且裴回

修仙詞

丹田自種留年藥玄谷長生續命芝世上漫忙兼漫

走不知求已更求誰

山中得劉秀才京書

自笑家貧客到踈滿庭煙草不能鋤今朝誰料三千
里忽得劉公一紙書

夏日題方師院

火天無處買清風悶發時來入梵宮只向方師小廊
下回看門外是樊籠

游春樂

一年三百六十日賞心那似春中物草迷曲渚花滿
園東家年少西家出

仙客歸鄉詞二首

六合八荒游未半子孫零落暫歸來井邊不認捎雲
樹多是門人在後栽

洞中日月洞中仙不筭離家是幾年出郭始知人代
變又須拋却古時錢

雲州飲席

酒腸雖滿少歡情身在雲州望帝城巡次合當誰改
令先須爲我打還京

戲贈李主簿

官罷江南客恨遙二年空被酒中消不知暗數春游

處偏憶揚州第幾橋

春詞 沈亞之亦有

黃鳥啼多春日高
紅芳開盡井邊桃
美人手暖裁衣
易片片輕雲落剪刀

題景上人山門

水有青蓮沙有金
老僧於此獨觀心
愁人欲寄中峯
宿只恐白猿啼夜深

妓人殘粧詞

雲髻已收金鳳皇
巧勻輕黛約殘粧
不知昨夜新歌
響猶在誰家繞畫梁

臨水亭

只怪素亭黏黛色
溪煙爲我染莓苔
欲知源上春風
起看取桃花逐水來

聽范玄長吟

聲聲扣出碧琅玕
能使秋猿欲叫難
詩興未窮心更
遠手垂青拂向雲看

觀葉生畫花

心竅玲瓏貌亦奇
榮枯只在手中移
今朝故向霜天
裏點破繁花四五枝

洗丹沙詞

千淘萬洗紫光攢夜火熒熒照玉盤恐是麻姑殘米
粒不曾將與世人看

長安春夜吟

露盤滴時河漢微美人燈下裁春衣蟾蜍東去鵲南
飛芸香省中郎不歸

自述

篋貯靈沙日日看欲成仙法脫身難不知誰向交州
去為謝羅浮葛長官

少年行

醉騎白馬走空衢惡少皆稱電不如五鳳街頭新勒

轡半垂衫袖揖金吾

越中遇寒食

去歲清明雪溪口今朝寒食鏡湖西信知天地心不
易還有子規依舊啼

贈採藥叟

老去唯將藥裹行無家無累一身輕却教年少取書
卷小字燈前鬪眼明

清夜憶仙宮子

夜靜門深紫洞煙孤行獨坐憶神仙三清宮裏月如
晝十二宮樓何處眠

江南怨

愁見橋邊荇葉新
蘭舟枕水楫生塵
從來不是無蓮采
十頃蓮塘賣與人

送絕塵子歸舊隱二首

雲水千重繞洞門
獨歸何處是桃源
仙方不用隨身去
留與人間老子孫

班藤爲杖草爲衣
萬壑千峯獨自歸
縱令相憶誰相報
桂樹巖邊人信稀

送裴秀才歸淮南

怪來頻起詠刀頭
楓葉枝邊一夕秋
又向江南別才

子却將風景過揚州

錢塘渡口

天塹茫茫連沃焦
秦皇何事不安橋
錢塘渡口無錢納
已失西興兩信潮

春日宴徐君池亭

暫憑春酒換愁顏
今日應須醉始還
池上有門君莫掩
從教野客見青山

山中送友人

欲折楊枝別恨生
一重枝上一啼鶯
亂山重疊雲相掩
君向亂山何處行

寄王少府

采松仙子徒銷日
喫菜山僧枉過生
多謝藍田王少府
人間詩酒最關情

贈女道士鄭玉華二首

玄髮新簪碧藕花
欲添肌雪餌紅沙
世間風景那堪戀
長笑劉郎漫憶家

明鏡湖中休采蓮
却師阿母學神仙
朱絲誤落青囊裏
猶是箜篌第幾絃

寄西臺李侍御

二千餘里採瓊瓌
到處傷心瓦礫堆
唯有繡衣周柱

史獨將珠玉挂西臺

贈凌仙姥

阿母從天降幾時
前朝唯有漢皇知
仙桃不啻三回熟
飽見東方一小兒

晚春送王秀才游剡川

越山花去剡藤新
才子風光不厭春
第一莫尋溪上路
可憐仙女愛迷人

馮上人院

擾擾凡情逐水流
世間多喜復多憂
一回行到馮公院
便欲令人百事休

金吾詞

行擁朱輪錦幃兒望仙門外叱金羈染鬚偷嫩無人
覺唯有平康小婦知

觀舞女

纏紅結紫畏風吹嫋娜初回弱柳枝買笑未知誰是
主萬人心逐一人移

鄆縣村居

欲往村西日日慵上山無水引高蹤誰能求得秦皇
術爲我先驅紫閣峯

酬周秀才

三展蜀牋皆郢曲我心珍重甚瓊瑤應緣水府龍神
睡偷得蛟人五色綃

旅次文水縣喜遇李少府

爲君三日廢行程一縣官人是酒朋共憶襄陽同醉
處尚書坐上納銀觥

夏雨後題青荷蘭若

僧舍清涼竹樹新初經一雨洗諸塵微風忽起吹蓮
葉青玉盤中瀉水銀

途中逢少女

身倚西門笑向東牡丹初折一枝紅市頭日賣千般

鏡知落誰家新匣中

山中翫白鹿

繞洞尋花日易銷
人間無路得相招
吻吻白鹿毛如雪
踏我桃花過石橋

山居樂

鸞鶴每於松下見
笙歌常向坐中聞
手持十節龍頭杖
不指虛空即指雲

襄陽曲

大堤女兒郎莫尋
三三五五結同心
清晨對鏡理容色
意欲取郎千萬金

望夫詞三首

看看北鴈又南飛
薄倖征夫久不歸
蟾子到頭無信處
凡經幾度上人衣

手執寒燈向影頻
回文機上暗生塵
自家夫婿無消息
却恨橋頭賣卜人

何事經年斷書信
愁聞遠客說風波
西家還有望夫伴
一種淚痕兒最多

少婦游春詞

簇錦攢花鬪勝遊
萬人行處最風流
無端自向春園裏
笑摘青梅叫阿侯

折柳枝

傷見路邊楊柳春一重折盡一重新今年還折去年處不送去年離別人

歸將吟

百戰放歸成老翁餘生得出死人中今朝授勅三回舞兩賜青娥又拜公

惜花詞

千樹繁紅遶碧泉正宜尊酒對芳年明朝欲飲還來此只怕春風却在前

拋纏頭詞

翠娥初罷繞梁詞又見雙鬟對舞時一抱紅羅分不足參差裂破鳳皇兒

望騎馬郎

碧蹄新壓步初成玉色郎君弄影行賺殺唱歌樓上女伊州誤作石州聲

春日錢塘雜興二首

酒姥溪頭桑嫋嫋錢塘郭外柳毵毵路逢鄰婦遙相問小小如今學養蠶

西鄰年少問東鄰柳岸花隄幾處新昨夜雨多春水闊隔江桃葉喚何人

唐詩卷三十三
古
翫手植松

却思毫末栽松處青翠纔將衆草分今日散材遮不
得看看氣色欲凌雲

夜笛詞

皎潔西樓月未斜笛聲寥亮入東家却令燈下裁衣
婦誤剪同心一半花

贈鄭倫吹鳳管

喃喃解語鳳皇兒曾聽梨園竹裏吹誰謂五陵年少
子還將此曲暗相隨

蜀茗詞

越椀初盛蜀茗新薄煙輕處攪來勻山僧問我將何
比欲道瓊漿却畏嗔

春霽

煎茶水裏花千片候客亭中酒一樽獨對春光還寂
寞羅浮道士忽敲門

諷山雲

閑雲生葉不生根常被重重蔽石門賴有風簾能掃
蕩滿山晴日照乾坤

日晚歸山詞

虎跡新逢雨後泥無人家處洞邊溪獨行歸客晚山

裏賴有鷓鴣臨路岐

翫花詞

今朝造化使春風開拆西施面上紅
竟日眼前猶不足數株昇入寸心中

萬首唐人絕句卷第三十三

萬首唐人絕句卷第三十四

七言一百首

長安早春

施肩吾 五十一首

報花消息是春風未見先教何處紅
想得芳園十餘日萬家身在畫屏中

再酬李先輩

清辭再發郢人家字字新移錦上花
能使龍宮買綃女低回不敢織輕霞

寄隱者

路絕空林無處問幽奇山水不知名
松門拾得一片

履知是高人向此行

寄四明山子

高樓只在千峯裏塵世望君那得知長憶去年風雨
夜向君窓下聽猿時

觀美人

漆點雙眸鬢繞蟬長留白雪占曾前愛將紅袖遮嬌
笑徃徃偷開水上蓮

收糶詞

斜月朧朧照半床
煒煒孤妾懶收糶
燈前再覽青銅鏡
枉插金釵十二行

仙女詞

仙女群中名最高
曾看王母種仙桃
手題金簡非凡筆
道是天邊玉兔毛

仙翁詞

世間無遠可爲游
六合朝行夕已周
壇上夜深風雨靜
小仙乘月繫蒼虬

遇李山人

遊山遊水幾千重
二十年中一度逢
別易會難君且住
莫交青竹化爲龍

同張鍊師溪行

青溪道士紫霞巾洞裏仙家舊是隣每見桃花逐流水無回不憶武陵人

桃源詞二首

天天花裏千家住揔爲當時隱暴秦歸去不論無舊識子孫今亦是他人

秦世老翁歸漢世還同白鶴返遼城縱令記得山川路莫問當時州縣名

送道友遊山

欲駐如今未老形萬重山上九芝清君今若問採芝路踏水踏雲攀杳冥

贈王屋劉道士

小有洞中長住客大羅天下後來仙出門即是尋常處未可還它跨鶴鞭

謝自然昇仙

分明得道謝自然古來漫說尸解仙如花年少一女
子身騎白鶴遊青天

秋吟獻李舍人

腸結愁根酒不消新驚白髮長愁苗主司儻許題名
姓筆下看成度海橋

山中喜靜和子見訪

絕壁深溪無四鄰每逢猿鶴即相親小奴驚出垂藤
下山犬今朝吠一人

春日題羅處士山舍

亂疊千峯掩翠微高人愛此自忘機春風若掃階前
地便是山花帶錦飛

訪松嶺徐鍊師

千仞峯頭一謫仙何時種玉已成田開經猶在松陰
裏讀到南華第幾篇

江南織綾詞

卿卿買得越人絲貪弄金梭懶畫眉女伴能來看新

簞鴛鴦正欲上花枝

宿蘭若

聽鍾投宿入孤煙巖下病僧猶坐禪獨夜客心何處
是秋雲影裏一燈然

題禪僧院

栖禪枝畔數花新飛作瑠璃地上塵谷鳥自啼猿自
叫不能愁得定中人

送絕粒僧

碧洞青蘿不畏深免將飢渴累禪心若期野客來相
訪一室無煙何處尋

早春遊曲江

芳處亦將枯槁同應緣造化未施功
羲和若擬動鑪鞴先鑄曲江千樹紅

佳人覽鏡

每坐臺前見玉容今朝不與昨朝同
良人一夜出門宿校却桃花一半紅

遇王山人

每欲尋君千萬峯豈知人世也相逢
一瓢遺却在何處應挂天台最老松

遇醉道士

霞帔尋常帶酒眠路旁疑是酒中仙
醉來不住人家宿多向遠山松月邊

送人歸台州

莫驅歸騎且徘徊更遣離情四五杯
醉後不憂迷客路遙看瀑布識天台

贈施仙姑

縹緲吾家一女仙冰容雖小不知年
有時頻夜看明月心在常娥几按邊

山院觀花

初來唯見空樹枝今朝滿院花如雪
門前爲報諸少

年明日來遲不堪折

經桃花夫人廟

誰能枉駕入荒榛隨例形相土木身不及連山種桃
樹花開猶得識夫人

代農叟吟

且將一笑悅豐年漸老那能日日眠引客特來山地
上坐看秋水落紅蓮

下第春遊

羈情含蘖復含辛淚眼看花只似塵天遣春風領春
色不教分付與愁人

送僧遊越

麻衣年少雪爲顏却笑孤雲未是閑此去若逢花柳
月樓禪莫向苧羅山

遇越州賀仲宣

君在鏡湖西畔住四明山下莫經春門前幾箇采蓮
女欲泊蓮舟無主人

江南積雨歎

人厭爲霖水毀溪牀邊生菌路成泥雨師一日三回
到棟裏閑雲豈得棲

雲中道上作

羊馬群中覓人道，鴈門關外絕人家。昔時聞有雲中郡，今日無雲空見沙。

同諸隱者夜登四明山

半夜尋幽上四明，手攀松桂觸雲行。相呼已到無人境，何處玉簫吹一聲。

戲鄭申甫

年少鄭郎那解愁，春來閑卧酒家樓。胡姬若擬邀他宿，挂却金鞭繫紫騮。

宿千越亭

琵琶洲上人行絕，千越亭中客思多。月滿秋江山

落不知誰問夜如何

少女詞二首

嬌羞不肯點新黃，踏過金鈿出繡牀。信物無端寄誰去，等閑裁破錦鴛鴦。

同心帶裏脫金錢，買取頭花翠羽連。手執木蘭猶未慣，今朝初上采菱船。

冬詞

錦繡堆中卧初起，芙蓉面上粉猶殘。臺前也欲梳雲髻，只怕盤龍手捻難。

昭君怨

馬上海勞別恨深，摠緣如玉不輸金。已知賤妾無歸日，空荷君王有悔心。

贈仙子

欲令雪貌帶紅芳，更取金瓶瀉玉漿。鳳管鶴聲來未足，懶眠秋月憶蕭郎。

越溪懷古

憶昔西施人未求，浣紗曾向此溪頭。一朝得侍君王側，不見玉顏空水流。

秋夜山中贈別友人

何處邀君話別情，寒山木落月華清。莫愁今夜無詩

思已聽秋猿第一聲

大堤新詠

行路少年知不知，襄陽全欠舊來時。宜城賈客載錢出，始覺大堤無女兒。

宿四明山

黎洲老人命余宿，杳然高頂浮雲平。下視不知幾千仞，欲曉不曉天雞聲。

禁中新柳

萬條金線帶春煙，深染青絲不直錢。又免生當離別地，宮鶻啼處禁門前。

酬張明府

潘令新詩忽寄來，分明繡段對花開。
此時欲醉紅樓裏，正被歌人勸一杯。

酬施先輩

孟簡一首

襄陽才子得聲多，四海皆傳古鏡歌。
樂府正聲三百首，黎園新入教青娥。

商山祠堂即事

竇常四首

奪嫡心萌事可憂，四賢西笑暫安劉。
後王不敢論珪組，土偶人前枳樹秋。

七夕

露盤花水望三星，髮髻虛無為降靈。
斜漢沒時人不寐，幾條蛛網下風庭。

過宋氏五女舊居

謝廷風韻婕妤才，天縱斯文去不回。
一宅柳花今似雪，鄉人擬築望仙臺。

杏山館聽子規

楚塞餘春聽漸稀，斷猿今夕讓霑衣。
雲埋老樹空山裏，髮髻千聲一度飛。

奉酬楊侍郎

竇牟四首

翠羽雕蟲日日新，翰林工部欲何神。
自悲由瑟無彈

處今作關西門下人

杏園渡

衛郊多壘少人家南渡天寒日又斜
君子素風悲已矣杏園無復一枝花

奉誠園聞笛

曾絕珠纓吐錦茵欲披荒草訪遺塵
秋風忽灑西園淚滿目山陽笛裏人

酬舍弟庠罷舉從辟

之荆且願依劉表折桂終慙見郤詵
舍弟未應絲作鬢園公不用印隨身

初入諫司喜家室至

竇羣七首

一旦悲歡見孟光十年辛苦伴滄浪
不知筆硯緣封事猶問傭書日幾行

春雨

昨日偷閑看花了今朝多雨柰人何
人間盡似逢花雨莫愛芳菲濕綺羅

送內弟袁德師

南渡登舟即水仙西垣有客思悠然
因君相問為官意不賣毗陵負郭田

贈劉大兄院長

萬年枝下昔同趨三事行中半已無路自長沙急相
見共驚雙鬢別來殊

晚自臺中歸

白髮駸駸生有涯青襟曾愛紫河車自憐悟主難歸
去馬上看山恐到家

假日尋花

武陵緣源不可到河陽帶縣詎堪夸
枝枝如雪南關外一日休閑盡屬花

經中年魯公廟

青史編名在篋中故林遺廟揖仁風
還將文字如顏

色暫下蒲車為魯公

段都尉別業

竇庠九首

曾識將軍段匹磾幾場花下醉如泥
春來欲問林園主桃李無言鳥自啼

靈臺鎮

曉日天山雪半晴紅旗遙識漢家營
近來胡騎休南牧羊馬城邊春草生

贈道芬上人善畫松石

雲濕煙村不可闕畫時唯有鬼神知
幾回逢着天台客認得巖西最老枝

金山寺

一點青螺碧浪中全依水府與天通晴江萬里雲飛盡
盡鰲背參差日氣紅

冬夜寓懷寄翰林王補闕

滿地霜蕪葉下枝幾回吟斷四愁詩漢家若欲論封禪
禪須及相如未病時

贈符載

白社會中嘗共醉青雲路上未相逢時人莫小池中
水淺處無妨有卧龍

龍門看花

無葉無枝不見空連天撲地逕纔通山鶯驚起酒醒處
處火焰燒人雪噴風

陪留守巡內至上陽宮感興二首

翠輦西歸七十春玉堂珠綴儼埃塵武皇弓劍埋何處
處泣問上陽宮裏人

愁雲漠漠草離離太液鉤陳處處疑薄暮毀垣春雨裏
裏殘花猶發萬年枝

陝府覽房杜二公仁壽中題紀竇鞏共二首

仁壽元和二百年蒙寵水墨淡如煙當時憔悴題名日
漢祖龍潛未上天

早春送宇文十

春遲不省似今年二月無花雪滿天
村店閉門何處宿夜深遙喚渡江船

經竇車騎故城

荒陂古堞欲千年名振圖書劍在泉
今日諸孫拜墳樹愧無文字續燕然

贈王氏小兒

竹林會裏偏憐小淮水清時最覺賢
莫倚兒童輕歲月丈人曾共爾同年

唐州東途作

綠林兵起結愁雲白羽飛書未解紛
天子欲開三面網莫將弓箭射官軍

新羅進白鷹

御馬新騎禁苑秋白鷹來自海東頭
漢皇無事須游獵雪亂爭飛錦臂鞬

秋夕

護霜雲映月朦朧烏鵲爭飛井上桐
夜半酒醒人不覺滿池荷葉動秋風

襄陽寒食寄宇文籍

煙水初銷見萬家東風吹柳萬條斜
大隄欲上誰相

伴馬踏春泥半是花

奉使薊門

自從身屬富人侯
蟬噪槐花已四秋
今日一莖新白髮
懶騎官馬到幽州

送劉禹錫

十年憔悴武陵溪
鶴病深林玉在泥
今日太行平似砥
九霄初倚入雲梯

送元稹西歸

南州風土滯龍媒
黃紙初飛勅字來
二月曲江連舊宅
阿婆情熟牡丹開

過驪山

翠輦紅旌去不回
蒼蒼宮樹鎖青苔
有人說得當時事
曾見長生玉殿開

洛中即事

高梧葉盡鳥巢空
洛水潺湲夕照中
寂寂天橋車馬絕
寒鴉飛入上陽宮

尋道者所隱不遇

籬外涓涓澗水流
槿花半點夕陽收
欲題名字知相訪
又恐芭蕉不柰秋

寄南游兄弟

書來未報幾時還，知在三湘五嶺間。
獨立衡門秋水闊，寒鴉飛去日銜山。

宮人斜

離宮路遠北原斜，生死深恩不到家。
雲雨今歸何處去，黃鸝飛上野棠花。

代鄰叟

年來七十罷耕桑，就暖支羸強下牀。
滿眼兒孫身外事，閑梳白髮向殘陽。

新營別墅寄家兄

懶性如今成野人，行藏由興不由身。
莫驚此度歸來

晚買得西山正值春

自京中將赴黔南

風雨荊州二月天，問人初宦峽中船。
西南一望和雲水，猶道黔南有四千。

南遊感興

傷心欲問前朝事，惟見江流去不回。
日暮東風春草綠，鷓鴣飛上越王臺。

題劒津

風前推折千年劒，巖下澄空萬古潭。
雙劒變成龍化去，兩溪相並水歸南。

放魚

金錢贖得免刀痕聞道禽魚亦感恩好去長江千萬里不須辛苦上龍門

王仙壇

林傑二首

羽客已登雲路去丹爐草木盡燒殘不知千載歸何日空使時人掃舊壇

乞巧

七夕今宵看碧霄牽牛織女渡河橋家家乞巧望秋月穿盡紅絲幾萬條

萬首唐人絕句卷第三十四

萬首唐人絕句卷第三十五

七言一百首

吳苑思

陳陶六十首

今人地藏古人骨古人花爲今人發江南何處葬西施謝豹空聞采香月

古意

麻姑井邊一株杏花開不如古時紅西鄰蔡家十歲女年年二月真東風

朝元引四首

帝燭熒煌下九天蓬萊宮曉玉爐煙無央鸞鳳隨金

母來賀薰風一萬年

正殿雲開露冕旒下方朱翠壓鰲頭天雞唱罷南山
曉春色先歸十二樓

萬宇靈祥擁帝居東華元老薦屠蘇龍池遙望非煙
拜五色瞳矐在玉壺

寶祚河宮一向清龜魚天篆益分明近臣誰獻登封
草五岳齊呼萬歲聲

宿天竺寺

一宵何期此靈境五天山香金地冷西僧示我高隱
心月在中峯葛洪井

古蓮塘

闔閭宮娃能采蓮明珠作佩龍爲船三千巧笑不復
見江頭廢苑花年年

雙桂詠

青冥結根易傾倒沃洲山中雙樹好瑠璃宮殿無斧
聲石上蕭蕭伴僧老

夏日懷

竹齋睡餘柘漿清麟鳳誘我勞此生忽憶天台掩書
坐澗雲起盡紅崢嶸

仙人詞二首

小山皆爲十洲客
莓苔爲衣雙耳白
青編遺我忽隱
身暮雨虹蜺一千尺

赤城門開六丁直
曉日已燒東海色
朝天半路聞玉
雞星斗離離礙龍翼

臨風歎

芙蓉樓中飲君酒
驪駒結言春楊柳
豫章花落不見
歸一望東風堪白首

春日行

鷓鴣初鳴洲渚滿
龍蛇洗鱗春水暖
病多欲問山寺
僧湖上人傳石橋斷

春歸去

九十春光在何處
古人今人留不住
年年白眼向黔
婁唯放蟻螬飛上樹

蜀葵詠

綠衣宛地紅倡倡
薰風似舞諸女郎
南鄰蕩子婦亡
賴錦機春夜成文章

南昌途中

古道寅綠蔓黃葛
栢伊冢西春水闊
村翁莫倚橫浦
曾一半魚鰕屬鷓獮

子規思

春山杜鵑來幾日夜啼南家復北家野人聽此坐惆
悵恐畏踏落東園花

吳興秋思二首

不是茗溪厭看月天涯有程雲樹涼何意汀洲剩風
雨白蘋今日似瀟湘

日夕鯤魚夢南國茗陽水高迷渡頭故山秋風憶歸
去白雲又被王孫留

閩川夢歸

千里潺湲建溪路夢魂一夕西歸去龍舫欲上巴獸
灘越王金雞報天曙

竹十首

不厭東溪綠玉君天壇雙鳳有時聞一峯曉似朝仙
處青節森森倚絳雲

萬枝朝露學瀟湘杳靄孤亭白石涼誰道乖龍不得
雨春雷入地馬鞭狂

須題內史琅玕塢幾醉山陽瑟瑟村剩養萬莖將掃
俗莫教凡鳥鬧雲門

一溪雲母間靈花似到封侯逸士家誰識雌雄九成
律子喬丹井在深涯

嘯入新篁一里行萬竿如甕鎖龍泓驚巢翡翠無尋

處閑倚雲根刻姓名

燕燕離時紫米香野溪羞色過東墻諸兒莫拗成蹊
筍從結高籠養鳳皇

迸玉閑抽上釣磯翠苗番次脫霞衣山童泥乞青驄
馬騎過春泉掣手飛

一節呼龍萬里秋數莖垂海六鼇愁更須瀑布峯前
種雲裏闌干過子猷

丘壑誰堪話碧鮮靜尋春譜認嬋娟會當小殺青瑤
簡圖寫龜魚把上天

玄圃千春閉玉叢湛陽一祖碧雲空不須騷屑愁江

島今日南枝在國風

鍾陵秋夜

洪崖嶺上秋月明野客枕底章江清蓬壺宮闕不可
夢一一入樓歸鴈聲

江上逢故人

十年蓬轉金陵道長哭青雲身不早故鄉逢盡白頭
人清江顏色何曾老

水調詞十首

黠虜迢迢未肯和五陵年少重橫戈誰家不結空閨
恨玉筋闌干妾最多

羽管慵調怨別離西園新月伴愁眉容華不分隨君
去獨有粧樓明鏡知

憶餞良人玉塞行梨花三見換啼鶯邊場豈得勝閨
閣莫逞瑀弓過一生

惆悵江南早鴈飛年年辛苦寄寒衣征人豈不思鄉
國只是皇恩未放歸

水閣蓮開燕引雛朝朝攀折望金吾聞道磧西春不
到花時還憶故園無

自從清野戍遼東舞袖香銷羅幌空幾度長安發梅
柳節旄零落不成功

長夜孤眠倦錦衾秦樓霜月苦邊心征衣一倍裝綿
厚猶慮交河雪凍深

瀚海長征古別離華山歸馬是何時仍聞萬乘尊猶
屈裝束千嬌嫁郅支

沙塞依稀落日邊寒宵魂夢怯山川離居漸覺笙歌
懶君逐粟姚已十年

萬里輪臺音信希傳聞移帳護金微會須麟閣留蹤
跡不斬天驕莫議歸

送謝山人歸江夏

黃鶴春風二千里山人佳期碧江水携琴一醉楊柳

堤日暮龍沙白雲起

閑居雜興五首

虞韶九奏音猶在只是巴童自棄遺
閑卧清秋憶師曠好風搖動古松枝

一顧成周力有餘白雲閑釣五溪魚
中原莫道無麟鳳自是皇家結網踈

長愛真人王子僑五松山月伴吹簫
從他浮世悲生死獨駕蒼麟入九霄

越里娃童錦作襦艷歌聲壓郢中姝
無人說向張京兆一曲江南十斛珠

雲堆西望賊連營分閩何當舉義兵
莫道羔裘無壯節古來成事盡書生

泉州刺桐花兼呈趙使君四首

猗猗小艷夾通衢晴日薰風笑越姝
只是紅芳移不得刺桐屏障滿中都

髣髴三株植世間風光滿地赤城閑
無因秉燭看奇樹長伴劉公醉玉山

赤帝嘗聞海上遊三千幢蓋擁炎洲
今來樹似離宮色紅翠欹斜十二樓

不勝攀折悵年華紅樹南看見海涯
故國春風歸去

盡何人堪寄一枝花

投贈福建桂常侍二首

後來台席更何人都護朝天拜近臣
長笑當時漢卿士等閑恩澤書麒麟

匝地歌鍾鎮海隅城池鞅掌舊名都
不知珠履三千外更許侯嬴寄食無

隴西行四首

漢主東封報太平無人金闕議邊兵
縱饒奪得林胡塞磧地桑麻種不生
誓掃匈奴不顧身五千貂錦喪胡塵
可憐無定河邊

骨猶是春閨夢裏人

隴戍三看塞草青樓煩新替護羌兵
同來死者傷離別一夜孤鳧哭舊營

黠虜生擒未有涯黑山營陣識龍蛇
自從貴主和親後一半胡風似漢家

荅蓮華妓

近來詩思清於水老去風情薄似雲
已向升天得門戶錦衾深愧卓文君

下第寄友

林寬 六首

詩人道僻命多奇更值干戈亂起時
莫作江陵王少

府一生吟苦竟誰知

華清宮

殿角鍾殘立宿鴉朝元歸駕望無涯香泉空浸宮前
草未到春時爭發花

終南山

標竒聳峻壯長安影入千門萬戶寒徒自倚天生氣
色塵中誰爲舉頭看

歌風臺

蒿棘空存百尺基酒酣曾唱大風詞莫言馬上得天
下自古英雄盡解詩

長安遣懷

醉下高樓醒後登任從浮薄笑才能青龍寺裏三門
上立爲南山不爲僧

聞鴈

接影橫空背雪飛聲聲寒出玉關遲上陽宮裏三千
夢月冷風清聞過時

贈竇牟

楊憑十四首

直用天才衆却瞋應欺李杜久爲塵南荒不死中華
老別玉翻同西國人

千葉桃花

千葉桃花勝百花孤榮春晚駐年華若教避俗秦人
見知向河源舊侶誇

春中汎舟

仙郎歸奏過湘東正值三湘二月中惆悵滿川桃杏
醉醉看還與曲江同

雨中怨秋

辭家遠客愴秋風千里寒雲與斷蓬日暮隔山投古
寺鍾聲何處雨濛濛

秋日獨遊曲江

信馬閑過憶所親秋山行盡路無塵主人莫惜松陰

醉還有千錢沽酒人

寄別

晚煙洲霧共蒼蒼河鴈驚飛不作行回旆轉舟行數
里歌聲猶自逐清湘

邊情

新種如今屢請和玉關邊上幸無他欲知北海苦辛
處看取節毛餘幾多

早發湘中

按節鳴笳中貴催紅旌白旆滿船開迎愁湓浦登城
望西見荆門積水來

海榴

海榴殷色透簾籠，看盛看衰意欲同。若許三英隨五馬，便將濃艷鬪繁紅。

春情

暮雨朝雲幾日歸，如絲如霧濕人衣。三湘二月春光早，莫逐狂風撩亂飛。

送客往荊州

巴丘過日暮登城，雲水湘東一色平。若愛春秋繁露學，正逢元凱鎮南荆。

戲贈馬鍊師

心嫌碧落更何從，月破花冠冰雪容。行雨若迷歸路處，近前唯見祝融峯。

湘江泛舟

湘川洛浦三千里，地角天涯南北遙。除却同傾百壺外，不愁誰柰兩魂消。

送別

江岸梅花雪不如，看君驛馭向南都。相聞不必因來鴈，雲裏飛難落素書。

唐昌觀玉蘂花

楊凝 十一首

瑤華瓊蘂種何年，蕭史秦嬴向紫煙。時控綵鸞過舊

邸摘花持獻玉皇前

別李協

江邊日暮不勝愁送客霑衣江上樓
明月峽添明月照蛾眉峯似兩眉愁

初次巴陵

西江浪接洞庭波積水遙連天上河
鄉信爲憑誰寄去汀洲燕鴈漸來多

上巳

帝京元巳足繁華細管清絃七貴家
此日風光誰不共紛紛皆是掖垣花

春怨

花滿簾櫳欲度春此時夫壻在咸秦
綠窻孤寢難成寐紫燕雙飛似弄人

送客歸常州

行到河邊從此辭寒天日遠暮帆遲
可憐芳草成衰草公子歸時過綠時

送別

春愁不盡別愁來舊淚猶長新淚催
相思儻寄相思子君別揚州揚子回

送客入蜀

唐詩集卷三十五
三
劍閣迢迢夢想間行人歸路遶梁山明朝騎馬搖鞭
去秋雨槐花子午閒

送別

仙花笑盡石門中石室重重掩綠空
斲下雲峯能幾日却回煙駕馭春風

殘花

五馬踟躕在路岐南來只爲看花枝
鶯銜蝶弄紅芳盡此日深閨那得知

戲贈友人

湘陰直與地陰連此日相逢憶醉年
美酒非如平

貴十升不用一千錢

卽事寄人

楊凌六首

中禁鳴鍾日欲高北窓欹枕望頻搔
相思寂寞青苔合唯有春風啼伯勞

早春雪中

新年雨雪少晴時屢失尋梅看柳期
鄉信憶隨回雁早江春寒帶故陰遲

比行留別

日日山川烽火頻三河重起舊煙塵
一生孤負龍泉劍羞把詩書問故人

秋原晚望

客鴈秋來次第逢
家書頻寄兩三封
夕陽天外雲歸盡
亂見青山無數峯

春霽花萼樓南聞宮鶯

祥煙瑞氣曉來輕
柳變花開共作晴
黃鳥遠啼鳩鵲
觀春風流出鳳皇城

明妃曲

漢國明妃去不還
馬馱絃管向陰山
匣中雖有菱花鏡
羞對單于照舊顏

後魏行

王穀一首

力微皇帝謗天嗣
太武凶殘人所畏
一朝拈擲飛上天
天子孫盡作河魚餌

東都望幸

章碣二首

懶修珠翠上高臺
眉月連娟恨不開
縱使東巡也無益
君王自領美人來

焚書坑

竹帛煙銷帝業虛
關河空鎖祖龍居
坑灰未冷山東亂
劉項元來不讀書

萬首唐人絕句卷第三十五

萬首唐人絕句卷第三十六

七言一百首

逢鄭三游山

盧仝 九首

相逢之處花茸茸
石壁攢峯千萬重
他日期君何處
好寒流石上一株松

楊子津

風卷魚龍暗楚關
白波沉却海門山
鵬騰鰲倒且快
性地拆天開
揔是閑

悲新年

新年何事最堪悲
病客遙聽百舌兒
太歲只遊桃李

徑春風肯管歲寒枝

客淮南病

揚州丞毒似燂湯客病清枯鬢欲霜且喜閉門無俗物四支安穩一張牀

風中琴

五音六律十三徽龍吟鶴響思庖羲二彈流水一彈月水月風生松樹枝

逢病軍人

行多有病住無糧萬里還鄉未到鄉蓬鬢衰吟古城下不堪秋氣入金瘡

送蕭二十三

淮上客情殊冷落蠻方春早客何如相思莫道無來使回鴈峯前好寄書

庭竹

負霜停雪舊根枝龍笙鳳管君莫截春風一番琴上來瑤碎金樽碧天月

山中

飢拾松花渴飲泉偶從山後到山前陽坡軟草厚如織困與鹿麕相伴眠

別舊山

于鵠四首

舊伴同游盡却回雲中獨宿守花開自是去人身漸
老暮山流水任東來

寄周惲

家在荒陂長似秋蓼花芹葉水蟲幽去年相伴尋山
客明月今宵何處遊

江南意

悶向江頭採白蘋還隨女伴賽江神衆中羞不分明
語暗擲金錢卜遠人

寓意

自小看花情不足江邊尋得一株紅黃昏人散春風

起吹落誰家明月中

夜夜曲

王偃一首

北斗星移銀漢低班姬愁思鳳城西青槐陌上人行
絕明月樓前烏夜啼

塞上曲

周朴二首

一墜風來一墜沙有人行處沒人家黃河九曲冰先
合紫塞三春不見花

塞下曲

石國胡兒向碛東愛吹橫笛引秋風夜來雲雨皆飛
盡月照平沙萬里空

鳳歸雲二首

滕潛二首

金井欄邊見羽儀
梧桐枝上宿寒枝
五陵公子憐文綵
畫與佳人刺繡衣

飲啄蓬山最上頭
和煙飛下禁城秋
曾將弄玉歸雲去
金翻斜開十二樓

忠州郡宅

白行簡一首

臨江一嶂白雲間
紅綠層層錦繡班
不作巴南天外意
何殊昭應望驪山

臺中寓直晚覽壁畫山水

羊士諤 廿九首

蟲思庭莎白露天
微風吹竹曉淒然
今來始悟朝回

客暗寫歸心向石泉

望女兒山

女兒山頭春雪消
路傍仙杏發柔條
心期欲去知何日
惆悵回車上野橋

宮人斜

翡翠無窮掩夜泉
猶疑一半作神仙
秋來還照長門月
珠露寒花是野田

王學士獨游青龍寺翫紅葉因贈

十畝蒼苔繞畫廊
幾株紅樹過清霜
高情還似看花去
閑對南山步夕陽

登樓

槐柳蕭疎繞郡城
夜添山雨作江聲
秋風南陌無車馬
獨上高樓故國情

憶江南舊遊二首

山陰道上桂花初
王謝風流滿晉書
曾作江南都從事
秋來還復憶鱸魚

曲水三春弄采毫
樟亭八月又觀濤
金罍幾醉烏程酒
鶴放閑吟把蟹螯

郡中即事二首

紅衣落盡暗香殘
葉上秋光白露寒
越女含情已無

限莫教長袖倚欄干

登臨何處見瓊枝
白露寒花自繞籬
唯有樓中好山色
稻畦殘水入秋池

游西山蘭若

路傍垂柳古今情
春草春泉咽又生
借問山僧好風景
看花携酒幾人行

寄江陵韓少尹

別來玄髮共成霜
雲起無心出帝鄉
蜀國魚牋數行字
憶君秋夢過南塘

資州宴行營回將

唐詩卷三十一
五
几劔盈庭酒滿卮
戍人歸日及瓜時
元戎靜鎮無邊事
遣向營中偃畫旗

看花

一到花間一忘歸
玉杯瑤瑟減光輝
歌筵更覆青油幕
忽似朝雲瑞雪飛

詠渠州常諫議使君

才子長沙暫左遷
能將意氣慰當年
至今猶有東山妓
長史歌詩被管絃

赴資陽經瞿冢山

寧辭舊路駕朱轡
重使疲人感漢恩
今日鳴騶到瞿

峽還勝博望至河源

野望二首

萋萋麥隴杏花風
好是行春野望中
日暮不辭停五馬
鴛鴦飛去綠江空

忘懷不使海鷗疑
水映桃花酒滿卮
亭上一聲歌白紵
野人歸棹亦行遲

蕭彭州出妓夜宴見送

玉顏紅燭忽驚春
微步凌波拂暗塵
自是當歌斂眉黛
不應惆悵爲行人

題松江館

唐詩卷三十一
津柳江風白浪平
棹移高館古今情
扁舟一去鴟夷子
應笑分符計日程

齋中詠懷

無心唯有白雲知
閑卧高齋夢蝶時
不覺東風過寒食
雨來萱草出巴籬

永寧里小園寄沈校書

故里心期柰別何
手移芳樹憶庭柯
東臯黍熟君應醉
黎葉初紅白露多

登郡前山

洛陽歸客滯巴東
處處山櫻雪滿叢
峴首當時爲風

景豈將官舍作池籠

春望

莫問華簪髮已班
歸心滿目是青山
獨上層城倚危檻
柳營春盡馬嘶閑

汎舟入後溪二首

東風朝日破輕嵐
仙棹初移酒未酣
玉笛閑吟折楊柳
春風無事傍魚潭

雨餘芳草淨沙塵
水綠灘平一帶春
唯有啼鶻似留客
桃花深處更無人

山閣聞笛

臨風玉管吹參差山塢春深日又遲李白桃紅滿城
郭馬融閑卧望京師

夜聽琵琶三首

掩抑危絃咽又通朔雲邊月想朦朧當時誰佩將軍
印長使蛾眉怨不窮

一曲徘徊星漢稀夜闌幽怨重依依忽似撻金來馬
上南枝棲鳥盡驚飛

破撥聲繁恨已長低鬟歛黛更摧藏
潏潏隴水聽難盡併覺風沙繞畫梁

灞上

紇干著 三首

鳴鞭晚日禁城東渭水晴煙灞岸風都傍柳陰回首
望春天樓閣五雲中

古仙詞

珠幡絳節曉霞中漢武清齋待少翁不向人間戀春
色桃花自滿紫陽宮

感春詞

未得鳴珂謁漢宮江頭寂寞向春風悲歌一曲心應
醉萬葉千花淚滿中

雨霽登北原

盧隱 五首

稻黃撲撲黍油油野樹連山澗北流憶得年時馮翊

郡謝郎相引上樓頭

長安親故

楚蘭不佩佩吳鉤帶酒城頭別舊遊
年事已多筋力在試將弓箭到并州

悲秋

秋空鴈度青天遠踈樹蟬嘶白露寒
階下敗蘭猶有氣手中團扇漸無端

晚蟬

深藏高柳背斜暉能軫孤愁感昔圍
猶畏旅人頭不白再三移樹帶聲飛

惟揚郡西亭贈友人

萍飈風池香滿船楊花漠漠暮春天
玉人此日心中事何似乘羊入市年

贈強山人

郎士元 三首

或棹輕舟或杖藜尋常適意釣前溪
草堂竹徑在何處落日孤煙寒渚西

栢林寺南望

谿上遙聞精舍鍾泊舟微徑度深松
青山霽後雲猶在畫出西南四五峯

聽鄰家吹笙

鳳吹聲如隔采霞不知墻外是誰家重門深鎖無尋處疑有碧桃千樹花

從軍

馬逢 三首

漢馬千蹄合一群單于鼓角隔山聞沙墮風起紅樓下飛上胡天作陣雲

宮詞二首

金吾持戟護軒簷天樂傳教萬姓瞻樓上美人相倚看紅粧透出水精簾

玉樓天半起笙歌風送宮人笑語和月影殿開聞曉漏水精簾捲近秋河

寓言

李洞 九首

三千宮女露蛾眉笑煮黃金日日遲麟鳳滯雲攀不及空山惆悵夕陽時

客亭對月

游子離魂隴上花風飄浪卷遶天涯一年十二度圓月十一回圓不在家

宿鄆郊贈羅處士

川靜星高栗已枯南山落石水聲麤白雲釣客窓中宿卧數嵩峯聽五湖

贈功臣

征蠻破虜漢功臣携劍歸來萬里身閑倚凌煙金柱
看形容消瘦老於真

有贈

愛酒耽棋田處士彈琴詠史賈先生御溝臨岸有雲
白不見鶴來何處行

送三藏歸西天

十萬里程多少難沙中彈舌受降龍五天到日應頭
白月落長安半夜鍾

金陵懷古

古來無此戰爭功日日戈船漾海風一度靈龜開睡

眼六朝灰盡九江空

長安縣廳

主人寂寞客屯遭愁列終南滿眼前乞取中庭藤五
丈爲君高斲望前天

題晰上人賈島詩卷

賈生詩卷惠休裝百葉蓮花萬里香供得半年吟不
足長須字字頂司倉

和茅山高拾遺山泉

儲嗣宗八首

香味清機仙府回縈紆亂石便流杯春風莫逐桃花
去恐引漁人入洞來

巢鶴

千歲雲間丁令威殷勤仙骨莫仙飛若逢茅氏傳消息
貞白先生不久歸

胡山

犬入五雲音信絕鳳棲疑碧悄無聲焚香古洞步虛
夜露濕松花空月明

小樓

松杉風外亂山青曲几焚香對石屏空憶去年春雨
後燕泥時污太玄經

山鄰

石橋春澗已歸遲夢入仙山山不知柱史從來非俗
吏青牛道士莫相疑

隨邊使過五原

偶逐星車犯虜塵故鄉常恐到無因五原西去陽關
廢日没平沙不見人

春懷寄秣陵知友

廬江城外柳堪攀萬里行人尚未還借問景陽臺下
客謝家誰更作東山

月夜

鴈池衰草露沾衣河水東流萬事微寂寞青陵臺上

月秋風滿樹鵲南飛

山行

李郢十八首

小田微雨稻苗香
田畔清溪瀟瀟涼
自憶東吳榜舟日
蓼花溝水半篙強

上元日寄湖杭二從事

戀別山燈憶水燈
山光水焰百千層
謝公留賞山公喚
知入笙歌阿那朋

寒食野望

舊墳新隴哭多時
流世都堪幾度悲
烏烏亂啼人未遠
野風吹散白棠梨

清明日題一公禪室

山頭蘭若石楠春
山下清明煙火新
此日何窮禮禪客
歸心誰是戀禪人

七夕寄張氏兄弟

新秋牛女會佳期
紅粉筵開玉饌時
好與檀郎寄花朵
莫教清曉羨蛛絲

春晚與諸同舍出城迎座主侍郎

三十驂騮一闕塵
來時不鎖杏園春
東風柳絮輕如雪
應有偷游曲水人

張郎中宅戲贈二首

薄雪燕翁紫燕釵釵垂簾簌抱香懷一聲歌罷劉郎
醉脫取明金壓繡鞋

謝家青妓遂重關誰省春風見玉顏聞道綵鸞三十
六一雙雙對碧池蓮

醉送

江梅冷艷酒清光急拍繁絃醉畫堂無限柳條多少
雪一將春恨付劉郎

曉井

桐陰覆井月斜明百尺寒泉古甃清越女携餅下金
索曉天初放轆轤聲

南池

小男供餌婦搓絲溢榼香醪倒接籬日出兩竿魚正
食一家歡笑在南池

偶作

一杯正發吟哦興兩盞還生去住愁何似全家上船
去酒旗多處即淹留

畫鼓

常聞畫鼓動歡情及送離人恨鼓聲兩杖一揮行纜
解暮天空使別魂驚

燕翁花

十二街中何限草
燕翁盡欲占殘春
黃花撲地無窮
極愁殺江南去住人

邵博士溪亭

野茶無限春風葉
溪水千重返照波
只去長橋三十
里誰人一解在帆過

小石上見亡友題處

筓石清瑤入紫煙
陸雲題處是前年
苔侵雨打依稀
在惆悵涼風樹樹蠅

洞靈觀流泉

石上苔蕪水上煙
潺湲聲在觀門前
千巖萬壑分流

去更引飛花入洞天

送李判官

津市停橈送別難
榮榮蠟炬照更闌
東風萬疊吹江
月誰伴袁襄宿夜灘

送梁補闕賦得荻花 朱長文 一首

柳家汀洲孟冬月
雲寒水清荻花發
一枝持贈朝天人
願比蓬萊殿前雪

越溪怨

後朝光 一首

越王宮裏如花人
越水溪頭采白蘋
白蘋未盡人先
盡誰見江南春復春

毀天樞

李休烈一首

天門街上倒天樞火急先須卸火珠計合一條麻線
挽何勞兩縣索人夫

萬首唐人絕句卷第三十六

萬首唐人絕句卷第三十七

七言一百首

宮鳥栖

趙嘏一百首

宮鳥栖處玉樓深微月生簷夜夜心香輦不回花自
落春來空佩辟寒金

長信宮

君恩已盡欲何歸猶有殘香在舞衣自恨身輕不如
燕春來長遶御簾飛

廣陵城

紅映高臺綠繞城城邊春草傍墻生隋家不向此中

盡汴水應無東去聲

冷日過驪山

冷日微煙渭水愁翠華宮樹不勝秋霓裳一曲千門
鎖白盡梨園弟子頭

下第後歸永樂里自題二首

無地無媒只一身歸來空拂滿牀塵尊前盡日誰相
對唯有南山似故人
玄髮侵愁忽似翁暖塵寒袖共東風公卿門戶不知
處立馬九衢春影中

出試日獨遊曲江

江莎漸映花邊綠樓日自開池上春雙鶴遶空來又
去不知臨水有愁人

題曹娥廟

青娥埋沒此江濱江樹颼颼慘暮雲文字在碑碑已
墮波濤辜負色絲文

題段氏中臺

看山臺下水無塵碧篠前頭曲水春獨對一樽風雨
夜不知家有早朝人

華州座中獻盧給事

送迎皆到三峯下滿面煙霜滿馬塵自是追攀認知

已青雲不假送迎人

商山道中

和如春色淨如秋五月商山是勝遊當畫火雲生不
得一溪縈作萬重愁

贈歙州妓

灩灩橫波思有餘庾樓明月墮雲初揚州寒食春風
寺看遍花枝盡不如

贈王明府

五柳逢秋影漸微陶潛戀酒不知歸但存物外醉鄉
在誰向人間問是非

呂校書雨中見訪

竹閣斜溪小檻明惟君來賞見山情馬嘶風雨又歸
去獨聽子規千萬聲

千秋嶺下

知有巖前萬樹桃未逢搖落思空勞年年盛發無人
見三十六溪春水高

歙州道中僕逃

去跳風雨幾奔波曾共辛勤柰若何莫遣窮歸不知
處秋山重疊戍旗多

重陽日寄草舍人

節過重陽菊委塵江邊病起杖扶身不知此日龍山
會誰是風流落帽人

贈薛勛下第

一擲雖然未得盧驚人不用繞牀呼牢之坐被青雲
逼祇問君能酷似無

宛陵望月寄沈學士

一川如畫敬亭東待詔閑遊處處同天竺山前鏡湖
畔何如今日庾樓中

翡翠巖

芙蓉幕裏千場醉翡翠巖前半日閑惆悵晉朝人不

到謝公拋力上東山

發新安後途中寄盧中丞二首

樓上風流庾使君笙歌曾醉此中聞目前已是陵陽
路回首叢山滿眼雲

晚樹蕭蕭促織愁風簾似水滿牀秋千山不礙笙歌
月誰伴羊公上夜樓

留題興唐寺

滿水樓臺滿寺山七年今日共躋攀月高對菊問行
客去折芳枝早晚還

廣陵道

鬪雞臺邊花照塵煬帝陵下水含春青雲回翅北歸
鴈白首哭途何處人

茅山道中

溪樹重重水亂流馬嘶殘雨晚程秋門前便是仙山
路目送歸雲不得遊

江上與兄別

楚國湘江兩渺瀰暖川晴鴈背帆飛人間離別盡堪
哭何況不知何日歸

落第

九陌初晴處處春不能回避看花塵由來得喪非吾

事本是釣魚船上人

宛陵館冬青樹

碧樹如煙覆晚波清秋欲盡客重過故園亦有如煙
樹鴻鴈不來風雨多

贈五老韓尊師

有客齋心事玉晨對山鬚鬢綠無塵住山道士年如
鶴應識當時五老人

經汾陽舊宅

門前不改舊山河破虜曾經馬伏波今日獨經歌舞
地古槐疎冷夕陽多

寄盧中丞

葉覆清溪灑灑紅路橫秋色馬嘶風獨携一榼郡齋
酒吟對青山憶謝公

途中

故園回首鴈初來馬上千愁付一杯惟有新詩似相
識暮山吟處共徘徊

寄裴瀾

綺雲初墮亭亭月錦度惟橫灑灑波宋玉逢秋正高
卧一篇吟盡柰情何

淮南丞相坐贈歌者虞姁

綺筵無處避梁塵虞姁清歌日日新來值渚亭花欲
盡一聲留得滿城春

酬段侍御

蓮花上客思閑閑數首新詩到篔關吟得楚天風雨
霽一條江水兩三山

尋僧一首

臺殿參差日墮塵塢西歸去一庵雲寒泉何處夜深
落聲隔半巖踈葉聞
溪戶無人谷鳥飛石橋橫木掛禪衣看雲日暮倚松
立野水亂鳴僧未歸

發栢梯寺

一泓秋水千竿竹靜得勞生半日身猶有向西無限地別僧騎馬入紅塵

西江晚泊

茫茫藹藹失西東柳浦桑村處處同戍鼓一聲帆影盡水禽飛起夕陽中

南池

照影池邊多少愁往來重見此塘秋芙蓉苑外新經雨紅葉相隨何處流

江樓舊感

獨上江樓思渺然月光如水水如天同來望月人何處風景依稀似去年

南園

雨過郊園綠尚微落花惆悵滿塵衣芳樽有酒無人共日暮看山還獨歸

南亭

孤亭影在亂花中悵望無人此醉同聽盡暮鐘猶獨坐水邊襟袖起春風

贈女仙

水思雲情小鳳仙月涵花態語如絃不因金骨三清

客誰識吳州有洞天

宣州送判官

來時健筆佐票姚去折槐花度野橋誰見樽前此惆悵一聲歌盡路迢迢

宿僧院

月滿長空樹滿霜度雲低拂近簷林林中夜半一聲磬卧見高僧入道場

尋僧

斜日橫窓起暗塵水邊門戶閉閑春千竿竹裏花枝動只道無人似有人

經王先生故居

晚波東去海茫茫誰識蓬山不死鄉弄玉已歸蕭史去碧樓紅樹倚斜陽

送從翁中丞奉使黠戛斯六首

楊雄詞賦舉天聞萬里油幢照塞雲僕射峯西幾千騎一時迎著漢將軍

旌旗杳杳鴈蕭蕭春盡窮沙雪未消料得堅昆受宣後始知公主已歸朝

雖言窮北海雲中屬國當時事不同九姓如今盡臣妾歸期那肯待秋風

牢山望斷絕塵氛
灑灑河西拂地雲
誰見魯儒持漢節
玉關降盡可汗軍

山川險易接胡塵
秦漢圖來或未真
自此盡知邊塞事
河湟更欲託何人

秦皇無策建長城
劉氏仍窮北路兵
若遇單于舊牙帳
却應傷歎漢公卿

東亭柳

拂水斜煙一萬條
幾隨春色倚河橋
不知別後誰攀折
猶自風流勝舞腰

僧舍二首

祇言雙鬢未蹉跎
獨柰牛羊送日何
禪客不歸車馬去
晚簷山色爲誰多

溪上禪關水木閒
水南山色與僧閑
春風盡日無來客
幽磬一聲高鳥還

新月

玉鉤斜傍畫簷生
雲匣初開一寸明
何事最能悲少婦
夜來依約落邊城

贈皇甫坦

養由弓箭已無功
牢落生涯事事同
相勸一杯寒食酒
幾多辛苦到春風

唐詩卷三十一
九
四祖寺

千株松下雙峯寺一盞燈前萬里身
自爲心猿不調伏祖師元是世間人

聽蟬

噪蟬聲亂日初曛絃管樓中永不聞
獨奈愁人數莖髮故園秋隔五湖雲

寄遠

禁鍾聲盡見棲禽關塞迢迢故國心
無限春秋莫相問落花流水洞房深

池上

正憐佳月夜深坐池上暖回燕鴈聲
猶有漁舟繫江岸故人歸盡獨何情

春日書懷

暖鶯春日舌難窮枕上愁生曉聽中
應裏綠窻殘夢斷杏園零落滿枝風

贈別

水邊秋草暮萋萋欲駐殘陽恨馬蹄
曾是管絃同醉伴一聲歌盡各東西

靈巖寺

館娃宮伴千年寺水闊雲多客到稀
聞說春來更惆

唐詩集卷三十一
十
悵百花深處一僧歸

代人聽琴二首

抱琴花夜不勝春
獨奏相思淚滿巾
第五指中心最
恨數聲嗚咽爲何人
湘娥不葬九疑雲
楚水連天坐憶君
惟有啼烏舊名
在忍教嗚咽夜長聞

訪沈舍人不遇

溪翁強訪紫微郎
曉鼓聲中滿鬢霜
知在禁闈人不
見好風飄下九天香

座上獻元相公

寂寞堂前日又曛
陽臺去作不歸雲
從來聞說沙吒
利今日青娥屬使君

遣興二首

溪花入夏漸稀疎
踈雨氣如秋麥熟
初終日苦吟人不
會海邊兄弟久無書
讀徹殘書弄水回
暮天何處笛聲哀
花前獨立無人
會依舊去年雙燕來

送李給事

眼前軒冕是鴻毛
天上人間漫自勞
脫却朝衣獨歸
去青雲不及白雲高

宿僧舍

高僧夜滴芙蓉漏遠客窓含楊柳風何處相逢話心地月明身在磬聲中

吳門夢故山

心熟家山夢不迷孤峯寒遶一條溪秋窓覺後情無限月墮館娃宮樹西

別李譜

尊前路映暮塵紅池上琴橫醉席風今日別君如別鶴聲容長在楚絃中

和杜侍郎題禪智寺南樓

樓畔花枝拂檻紅露天香動滿簾風誰知野寺遺鈿處盡在相如春思中

發青山

鳧鷖聲暖野塘春鞍馬嘶風驛路塵一宿青山又前去古來難得是閑人

寄道者

洞庭先生歸路長海雲望極春茫茫別來幾度向蓬島自傍瑤臺折靈草

入藍關

微煙已辨秦中樹遠夢更依江上臺看落晚花還悵

望鯉魚時節入關來

落第寄沈詢

穿楊力盡獨無功
華髮相期一夜中
別到江頭舊吟處
爲將雙淚問春風

送韋中丞

二年恩意是春輝
清淨曾襟似者希
泣盡楚人多少淚
滿船唯載酒西歸

詠端正春樹

一樹繁陰先著名
異花竒葉儼天成
馬嵬此去無多地
祇合楊妃墓上生

叙事獻同州侍御三首

青雲席中羅襪塵
白首江上吟詩人
登龍不及二千士
虛度膺門二十春

平生望斷雲層層
紫府杳是他人登
却應歸訪溪邊寺
說向當時同社僧

尊前誰伴謝公游
蓮岳晴來翠滿樓
坐見一方金變化
獨吟紅藥對殘秋

婺州宴上留別

雙溪樓影向雲橫
歌舞高臺晚更清
獨自下樓騎瘦馬
搖鞭重入亂蟬聲

別牛郎中門館

整襟收淚別朱門
自料難酬顧念恩
招得片鳧騎匹
馬西風斜上入秋原

山中寄盧簡求

竹西池上有花開
日日幽吟看又回
心憶郡中蕭記
室何時暫別醉鄉來

寄梁侗兄弟

桃李春多翠影重
竹樓當月夜無風
荀家兄弟來還
去獨倚欄干花露中

同州南亭陪劉侍郎送劉先輩

處處雲隨晚望開
洞庭秋入管絃來
謝公待醉消離
恨莫惜臨川酒一杯

贈館驛劉巡官

雲別青山馬踏塵
負才難覓作閑人
莫言館驛無公
事詩酒能消一半春

贈解頭賈嵩

賈生名跡忽無倫
十月長安看盡春
顧我先鳴還自
笑空沾一第是何人

題曹壁

曉傍疎林露滿巾
碧山秋寺屬閑人
溪頭盡日看紅

葉却笑高僧衣有塵

沙溪館

翠濕衣襟山滿樓
竹間溪水遶牀流
行人莫羨郵亭吏
生向此中今白頭

李侍御歸炭谷山居同宿華嚴寺

家在青山近玉京
白雲紅樹滿歸程
相逢一宿最高寺
半夜翠微泉落聲

過噴玉泉

平生半爲山淹留
馬上欲去還回頭
兩京塵路一雙鬢
不見玉泉千萬秋

漢陰庭樹

掘溝引水澆蔬圃
插竹爲籬護藥苗
楊柳如絲風易亂
梅花似雪日難消

送王拾遺謝官後歸滄水山居

水邊殘雪照亭臺
臺上風襟向雪開
還似當時姓丁鶴
羽毛成後一歸來

宿長水主人

白雲溪北叢巖東
樹石夜與潺湲通
行人一宿翠微月
二十五絃聲滿風

萬首唐人絕句卷第三十七

萬首唐人絕句卷第三十七

